

# Pendekatan inklusif tangani masalah kemiskinan bandar

Oleh MAISARAH SHEIKH RAHIM  
maisarah.rahim@mediamulia.com.my

**PUTRAJAYA:** Kerajaan melancarkan Program Kemiskinan Bandar (SMY) di Wilayah Persekutuan sebagai pendekatan inklusif dalam menangani isu kos sara hidup, kelangsungan hidup rakyat serta membasmi kemiskinan di Wilayah Persekutuan, khususnya semasa Covid-19.

Perdana Menteri, Tan Sri Muhyiddin Yassin berkata, program itu selari dengan prinsip Prihatin Kerajaan Perikatan Nasional (PN) dan mendukung inspirasi Wilayah Persekutuan, Wilayah Prihatin hasil tindakan proaktif Kementerian Wilayah Persekutuan dalam melengkapkan inisiatif kerajaan dengan melaksanakan program sosial safety net di wilayah.

Bertepatan dengan strategi itu, Perdana Menteri berkata, sepanjang tahun lalu sahaja, lebih 35,000 orang dan ketua isi rumah serta 331 perumahan kos rendah di Kuala Lumpur telah menerima bantuan langsung melalui Program Kemiskinan Bandar (SMY) itu iaitu inisiatif MYJobs@Wilayah, MYGrocer@Wilayah, MYSchoolBus@Wilayah, MYMedic@Wilayah dan MYFood@Wilayah.

“Berdasarkan tinjauan Pendapatan Isi Rumah dan Kemu-



**MUHYIDDIN YASSIN**

dahan Asas 2019 oleh Jabatan Perangkaan Malaysia, Pendapatan Garis Kemiskinan atau PGK Nasional telah meningkat kepada RM2,208 sebulan bagi setiap isi rumah.

“Ini bermakna, lebih 400,000 isi rumah yang berpendapatan kurang daripada PGK ini telah tergolong dalam kategori miskin,” katanya ketika melancarkan Program Kemiskinan Bandar (SMY) di Wilayah Persekutuan bersempena sambutan Hari Wilayah Persekutuan Tahun 2021, malam tadi.

Menurut Perdana Menteri, sehingga 31 Disember tahun

lalu, statistik Pertubuhan Keselamatan Sosial (Perkeso) merekodkan seramai 6,805 orang telah kehilangan pekerjaan pada bulan Disember 2020.

Dari segi pencari kerja pula, beliau memberitahu, seramai 53,869 orang direkodkan berbanding lebih 170, 000 kekosongan jawatan.

Justeru, katanya, dalam usaha menangani masalah tersebut, Kementerian Wilayah Persekutuan menerusi Program MyJob@Wilayah telah menyediakan sehingga 3,259 pekerjaan di ibu kota iaitu 28 peratus lebih tinggi daripada sasaran asal dengan inisiatif pengambilan pekerjaan meliputi pelbagai sektor dan industri.

“Inisiatif MySchoolBus@Wilayah telah memberi bantuan kepada seramai 9,704 murid di 67 kawasan perumahan awam kos rendah yang melibatkan 94 orang pengendali bas sekolah.

“MYMedic@Wilayah pula adalah perkhidmatan klinik bergerak yang menyediakan perkhidmatan rawatan kesihatan asas secara percuma kepada warga kota yang kurang berkemampuan,” katanya.

Muhyiddin berkata, MYGrocer@Wilayah pula adalah inisiatif yang berkonsepkan pasar bergerak ke kawasan perumahan kos rendah melalui penjualan barang basah dan keperluan

harian pada harga 5 hingga 20 peratus lebih murah daripada harga di pasar awam.

Sehingga kini, kata beliau, trak MyGrocer telah bergerak ke 30 lokasi Perumahan Awam dan Perumahan Rakyat di Kuala Lumpur, manakala MYFood@Wilayah adalah konsep bantuan bakul makanan yang berisi keperluan harian kepada golongan miskin bandar dan kini telah memanfaatkan seramai 32,000 ketua isi rumah.

“Bagi menambah baik inisiatif murni ini, saya dimaklumkan Kementerian Wilayah Persekutuan akan melipatgandakan usaha dengan meneliti semula sasaran penerima bantuan bagi mengelakkan individu yang layak tidak tercicir kerana pada masa ini bantuan lebih banyak diberikan kepada penghuni PPR dan Perumahan Awam.

“Saya turut ingin berkongsi berita gembira kepada penduduk di Wilayah Persekutuan. Kementerian Wilayah Persekutuan dengan kerjasama Yayasan Wilayah Persekutuan dan Majlis Perwakilan Penduduk Wilayah Persekutuan melalui Program MyBeras@Wilayah akan mula menyumbangkan 5,750 kampak beras secara percuma setiap minggu kepada penduduk dari kumpulan keluarga B40 di Kuala Lumpur, Putrajaya dan Labuan bermula pada hari ini,” katanya.